



## **Uunga siunnersuut: Nappaatit tunillaassortut akiorniarlugit iliuitsit pillugit Inatsisartut inatsisaat.** (Peqqissutsimut Naalakkersuisoq)

### **Siullermeernera**

Nappaatit tunillaassortut akiorniarlugit iliuitsit pillugit Inatsisartut inatsisissaattut siunnersuut Peqqissutsimut Naalakkersuisup Naalakkersuisut sinnerlugit saqqummiusnaanut qujalluta Naleqqamiit imaattumik oqaaseqarfigissavarput.

Soorunami isumaqataavugut inuiaqatigiit nappaatinut navianartunut tuniluuttunullu illersorneqarnissaat pingaartinneqarmat. Una massakkut killiffigisarput ajoraluartumik pivoq, taamaammallu inuiaqatigiit innuttaasullu illersorniarlugit assigiinngitsunik iliuseqartariaqalerneq pisariaqalersimalluni.

Nappaat inunnut ulorianartoq tassaavoq tuniluuttartoq, annertuumik inuiaqatigiit akornanni tunillaassorsinnaasoq annertuumillu toqqutaasartoq. Nalinginnaasumik taaneqarsinnaasut tassaatinneqarput nappaatit TB, kuppit, SARS aammalu pesti tassa nappaassuaq, taakkulu atugaasareernikuupput annerusumilu katsorsarneqartarnertigut inunnut katsorsaat tassa nakorsaat qanoq kinguneqarsinnaanerat ilisimasaqarfigineqalereersimallutik.

Taava massakkut una nappaat nunarsuarmi tuniluuterujussuartoq inuppassuarnillu toqqutaareersoq nutaatullu taaneqarsinnaasoq coronavirusi tassa covid 19 ullutsinni suli tunillaassorluni atugaangaatsiartoq eqqarsaatigalugu covid 19-mut akiuussutit timitsinnut anngunneqartunit kingunerisinnaasaat pillugit suli innuttaasut annerumik malinnaatinneqanngimmata oqaaseqarfigilaassavara.

Akiuussutissat kapuutit nutaat aamma nakorsaatit iisartakkat nutaat piffissap sivikitsup iluani sanaajusut saqqummerpata piffissallu sivikitsup iluani inuiaqatigiinnut atuutsinneqalerpata inummut kingunissai suusinnaaneri immikkut misissuiffigineqarnissaa inatsimmi arlaanni ilanngussinnaanersoq imaluunniit qanoq allatut iliortoqarsinnaanersoq paaserusunnarpoq. Tassami



assersuutigiinnarlugu nunarsuami nutaarsiassat iserfigilaaraanni covid-19 –mut akiuussutissanik kapooraareernerup kingorna arnarpassuit ukiuit assigiinngitsukkuutaartut aqartarnermikkut assigiinngitsutigut allannguuteqarsimapput, Kalaallit Nunaanni tamanna aamma malugineqarpoq. Ataasiaannarnangalu saaffigitippunga peqqissutsimut ataatsimiititaliaq aqutitigalugu covid 19-mut akiuussusertereernerup kingorna arnat aqartarnermikkut allannguutaannik akiuussutissaq pequtaanersoq paasiniaasoqarnissaanik kiisalu kapitereernerup kingorna sunniutigisinnaasai allat suusinnaaneri misissuisoqarnissaa pillugu anngusseqqullunga, innuttaasut tusaallugit anngussaallu pisariaqarmata peqqissutimut ataatsimiititaliaq aqutitigalugu anngussisimavunga, oqaatigeriiginnarlara ataatsimiititaliaq akissummik suli utertiffigitinngimmat.

Tassami innuttaasut arnaagaluarpata, angutaagaluarpata, meeraagaluarpata utoqqaagaluarpataluunniit nakorsaatit iisartakkat aamma akiuussutissat kapoorutit nutaajuppata qanorluunniit piffissap sivikitsup iluani innuttaasunut atuutsinneqaleraluarpataluunniit kingunerisinnaasaat annerusumik ilisimaneqanngippata innuttaasut peqqinnissaqarfit aqutitigalugu pisussaaffigaarput sutigut tamatigut kingunerisinnaasai pillugit nutaarsiassartaqarpata malinnaatinneqarnissaat, timip iluani akiuussutissap nappaammut akiuunnera sivikikkaluarpalluunniit.

Naggataatigut akiuussutissamik kapitinnikkunngitsut pisinnaatitaaffiit pitsaanagerusinnaasut taakkunungalu paasiuminarlutillu atoruminartuunissaat aamma Naleqqamiit pingaartillugu taarusupparput. Tassami tulluurtuunngilaq kapitikkusunngitsut kapitissinnaanngitsullu arlaatigut allanik nappaateqarneq peqqutitigalugu pisinnaaffiigaasutut misigisassappata, taamaammat taakku ilanngullugit nalilersoqqittariaqartutut Naleqqamiit isigaagut.

Taama Naleqqamiit oqaaseqarluta ataatsimiititaliamut susassaqtumut ingerlateqqipparput.